



## Godišnji izvještaj Glavnog disciplinskog tužioca za period od 01.01.2014.godine do 31.12.2014. godine

### Sažetak

- Primljeno 1.129 pritužbi, riješeno 1.138 pritužbi;
- Ukupan broj otvorenih predmeta na dan 31.12.2014. godine je na nivou iz 2013. godine i iznosi 745 predmeta;
- Samo 30% predmeta UDT-a je starije od godinu dana;
- Pokrenuto 18 disciplinskih postupaka i 1 postupak privremenog udaljenja;
- Okončano 17 disciplinskih postupaka;
- Nastavljen trend otvaranja predmeta po službenoj dužnosti zbog nastupanja zastare krivičnog gonjenja;
- Od ukupnog broja pokrenutih disciplinskih postupaka u 2014. godini, 22% postupaka je pokrenuto zbog zastare krivičnog gonjenja.
- Na dan 31.12.2014. godine, pred disciplinskim komisijama VSTV BiH vodi se sedam (7) disciplinskih postupaka.
- U toku 2014. godine nije odbijena niti jedna disciplinska tužba.


### 1. Uvod

Članom 65. Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 25/04, 93/05, 48/07 i 15/08), propisana je obaveza Ureda disciplinskog tužioca (u daljem tekstu: „UDT“) da periodično u pismenoj formi izvještava Vijeće o svojim aktivnostima. Postupajući u skladu s navedenom odredbom i dosadašnjom praksom, u ovom godišnjem izvještaju će se predstaviti podaci i informacije koje odražavaju rezultate rada UDT-a i VSTV-a BiH u 2014. godini u pogledu ovlaštenja koja se odnose na postupanje u disciplinskim stvarima. Naime, pregled podataka za 2014. godinu je prema ustaljenoj metodologiji izvještavanja, u najvećem dijelu dat sa paralelnim pregledom podataka iz 2013. godine, ali i sa pregledom relevantnih podataka iz ranijih godina rada UDT-a.

### 2. Priliv pritužbi

U 2014. godini registrovano je ukupno **1.129 novih pritužbi, a riješeno je 1.138 pritužbi**. UDT je dakle tokom 2014. godine u prosjeku registrovao 94 pritužbe mjesečno, što u većoj mjeri ne odudara od inenziteta priliva u 2013. godini, kada je registrovano 1.196 novih pritužbi.

Grafikon br. 1. Pregled priliva pritužbi po godinama



### 3. Struktura pritužbi

Što se tiče strukture podnositelaca pritužbi, u najvećem broju slučajeva podnosioci su, kao i do sada, stranke u postupku (oko 49%). Nakon stranaka u postupku, najčešći podnosioci pritužbi na rad sudija i tužilaca su advokati koji su u toku 2014. godine podnijeli 161 pritužbu protiv sudija i tužilaca. Nakon toga slijede pritužbe koje UDT registruje po službenoj dužnosti (oko 11%). Što se tiče ove vrste predmeta, bitno je istaći da se najveći dio njih odnosi na predmete koji su formirani po osnovu izvještaja sudova i tužilaštva o nastupanju zastare krivičnog gonjenja ili izvršenja sankcija (oko 83% svih *ex officio* predmeta). Ostatak *ex officio* predmeta formiran je na osnovu izvještaja i informacija dostavljenih od različitih državnih organa i institucija (npr. Državna agencija za istrage i zaštitu, policijske agencije, Uredi ombudsmena, Helsinški komitet za ljudska prava i sl.), zatim na osnovu odluka Ustavnog suda Bosne i Hercegovine u kojima je konstatovano kršenje člana 6. Evropske konvencije za ljudska prava (pravo na pravično suđenje), te navoda iz pisanih i elektronskih medija.

Značajan broj podnositelaca pritužbi su učesnici u postupku kao što su svjedoci, sudski tumači, oštećena lica i sl. (oko 9,5 %). Pored njih, kao podnosioci su registrovana i treća lica, državni organi i institucije, nosioci pravosudnih funkcija (sudije, tužioci, stručni saradnici), rukovodioci pravosudnih institucija, kao i uposlenici u sudovima i tužilaštvima.

Kao što je to bio slučaj i u prethodnim godinama, UDT je i u 2014. godini registrovao određeni broj predmeta na osnovu anonimno podnesenih pritužbi (41 pritužba). U odnosu na 2013. godinu, značajno je napomenuti da je broj anonimno podnesenih pritužbi povećan za 24,4 %.

Sadržaj navoda pritužbi se nije bitnije izmijenio u odnosu na prethodni period. U najvećem broju slučajeva, podnosioci pritužbi izražavaju svoje nezadovoljstvo zbog neopravdanog kašnjenja u izradi odluka ili kašnjenja u drugim radnjama u vezi sa obavljanjem sudijske dužnosti te nemarnim postupanjem i odlučivanjem sudije ili tužioca. Stranke tako najčešće u pritužbama ističu svoje nezadovoljstvo zbog dužine trajanja postupaka, a što dovode u vezu sa nesposobnošću i neprofesionalnošću sudija kao i sa njihovom navodnom pristrasnošću. Ovakvi navodi su otprilike sadržani i u pritužbama u kojima se stranke žale na postupanje tužilaca. Određeni broj pritužbi fokusiran je i na traženje pomoći od UDT-a, odnosno VSTV-a BiH u pravcu ubrzanja neokončanih sudskih postupaka ili utjecaja na njihov tok, odnosno na postupanje tužilaštva u tom smislu.

Pritužbe se tako najvećim dijelom odnose na postupanje sudija općinskih sudova (ukupno 493 pritužbe) i osnovnih sudova (ukupno 219 pritužbi), zatim kantonalnih tužilaca (150 pritužbi) kao i sudija kantonalnih sudova (103 pritužbe). Veći broj registrovanih pritužbi u odnosu na nosioce pravosudnih funkcija u Federaciji BiH je posljedica činjenice da u Federaciji BiH ima više pravosudnih institucija, pa samim tim i više sudija i tužilaca nego što je to slučaj u Republici Srpskoj. Imajući u vidu navedene podatke, može se zaključiti da se od ukupnog broja podnesenih pritužbi oko 59 % odnosi na prvostepene sudske institucije, odnosno općinske i osnovne sudove.

Predsjednici sudova i glavni tužioci u svojim pritužbama najčešće kao prestepe nosilaca pravosudnih funkcija navode kašnjenja u izradama odluka i provođenju radnji u postupku, greške u postupanju, nedolično ponašanje prema strankama i kolegama, neispunjavanje norme, nastupanje zastarjelosti u krivičnim i prekršajnim predmetima i sl.

Tabela br. 1. Broj registrovanih pritužbi u 2014. godini po sudiji

	Broj sudija	Broj pritužbi	Broj pritužbi po sudiji
<b>Federacija BiH</b>	658	606	0,92
<b>Republika Srpska</b>	362	320	0,88
<b>Brčko distrikt</b>	30	21	0,70

<b>Sud BiH</b>	51	8	0,15
<b>Sudije u BiH</b>	<b>1101</b>	<b>955</b>	<b><u>0,86</u></b>

Tabela br. 2. Broj registrovanih pritužbi u 2014. godini po tužiocu

	<b>Broj tužilaca</b>	<b>Broj pritužbi</b>	<b>Broj pritužbi po tužiocu</b>
<b>Federacija BiH</b>	201	153	0,76
<b>Republika Srpska</b>	96	54	0,56
<b>Brčko distrikt</b>	10	12	1,2
<b>Tužilaštvo BiH</b>	53	32	0,60
<b>Tužioci u BiH</b>	<b>360</b>	<b>251</b>	<b><u>0,69</u></b>

Iz predočenih podataka je vidljivo da je i u 2014. godini učestalost podnošenja pritužbi na tužioce u Republici Srpskoj manja (0,56 pritužbi po tužiocu) nego što je to slučaj u Federaciji BiH (0,76 pritužbi po tužiocu), ali je ova razlika značajno smanjena u odnosu na 2013. godinu. Također, u odnosu na 2013. godinu kada je evidentirano ukupno 307 pritužbi na tužioce, u toku 2014. godine, ovaj je broj značajno manji, a što, uzimajući u obzir veći broj tužilaca utiče i na značajno manji broj pritužbi po tužiocu u odnosu na 2013. godinu (0,93)

#### 4. Postupanje UDT-a po pritužbama i rješavanje pritužbi

Kao dio redovnih aktivnosti u cilju ispitivanja navoda o povredama službenih dužnosti sudija i tužilaca, koristeći se ovlaštenjem iz člana 66. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br.25/04, 93/05, 48/07 i 15/08, u daljem tekstu: „Zakon o VSTV BiH“), a u skladu sa članom 51. Pravilnika o sistemu za automatsko upravljanje predmetima u sudovima (CMS Pravilnik), te u skladu sa članom 45. Pravilnika o sistemu za automatsko upravljanje predmetima u tužilaštvima (TCMS Pravilnik), UDT vrši uvid u sudske i tužilačke predmete.

Tako je UDT u toku 2014. godine u 683 predmeta UDT-a o navodnim povredama dužnosti sudija i tužilaca, izvršio uvid u ukupno 1810 sudskih i tužilačkih spisa.

Vršenje uvida u spise sudskih i tužilačkih predmeta putem CMS-a/TCMS-a značajno doprinosi ekonomičnosti i efikasnosti rada UDT-a, a u smislu skraćivanja vremena potrebnog za pribavljanje dokumentacije i informacija, ušteda na strani pravosudnih institucija koje nemaju potrebu za fotokopiranjem obimne dokumentacije iz predmeta, te ušteda i na strani UDT-a i VSTV BiH jer je na ovaj način smanjena potreba za odlascima u sud, odnosno tužilaštvo na kojem se nalazi predmet u koji je potrebno izvršiti uvid.

Tabela br. x prikazuje broj uvida u spise predmeta, kako sudske, tako i tužilačke, razloženo po godinama, kao i ukupan broj uvida u spise predmeta od 2012. godine do 2014. godine. Iz navedene tabele evidentno je da je broj uvida u spise daleko veći u sudskim predmetima, nego u tužilačkim. Međutim, ovaj broj srazmjeran je broju podnesenih pritužbi protiv sudija, u odnosu na broj podnesenih pritužbi protiv tužilaca.

Tabela br. 4. Pregled uvida u sudske/tužilačke spise putem CMS-a/TCMS-a

	Broj uvida u CMS - sudski predmeti	Broj pritužbi u kojima se tražio uvid	Broj uvida u TCMS - tužilački predmeti	Broj pritužbi u kojima se tražio uvid
2012 g.	484	110	13	9
2013 g.	569	211	117	51
2014 g.	513	242	114	60
<b>UKUPNO</b>	<b>1566</b>	<b>563</b>	<b>244</b>	<b>120</b>
Ukupno uvida u spise			1810	
Ukupno pritužbi u kojima se tražio uvid u spise:			683	

Značajno je napomenuti da je UDT ostvario saradnju sa nadležnim odjelom unutar VSTV-a u cilju razvoja i nadogradnje kako postojećeg DCMS sistema unutar UDT-a, tako i načina vršenja uvida u sudske i tužilačke spise putem CMS-a/TCMS-a, te je kroz dostavljanje potrebnih informacija započeta saradnja koja bi u toku 2015. godine trebala rezultirati poboljšanjem funkcionalnosti DCMS-a.

U izvještajnom periodu riješeno je ukupno **1.138 pritužbi**.

Kao što je to i naznačeno u ranijim izvještajima UDT-a, u narednom periodu se ne može očekivati značajniji pad ukupnog broja otvorenih predmeta, obzirom da većinu otvorenih predmeta čine predmeti koji su „mlađi“ od godinu dana. Tako npr. struktura otvorenih predmeta po njihovoj starosti na dan 31.12.2014. godine izgleda ovako:

- broj otvorenih predmeta koji potječu iz 2013. godine: 225 predmeta;
- broj otvorenih predmeta koji potječu iz 2014. godine: 520 predmeta.

Iz navedenog proizlazi da oko 70% otvorenih predmeta čine predmeti koji su formirani u 2014. godini i koji trebaju biti okončani u toku 2016. godine, dok tek 30% predmeta treba biti okončano do kraja 2015. godine. Ovaj podatak također značajno utječe na dinamiku zatvaranja predmeta, jer prema trenutnom stanju stvari, disciplinski tužioci uglavnom postupaju po predmetima iz 2014. godine.

Pored navedenog, na smanjenje ukupnog broja otvorenih predmeta također utječe i činjenica da se u velikom broju slučajeva ispituju navodi o odugovlačenju u postupanju od strane sudija i tužilaca. Ovakva vrsta predmeta, sa aspekta dinamike i kontinuiteta poduzimanja istražnih radnji od strane disciplinskih tužilaca, zahtijeva stalno praćenje postupanja suda/tužilaštva u konkretnom predmetu, a što u cjelini utiče i na dužinu trajanja istrage.

Ipak, i pored navedenog, UDT je uspio održati kontinuitet u ukupnom broju otvorenih predmeta. Tako je dana 31.12.2014. godine registrovano ukupno **745 neriješenih predmeta**. Poređenja radi, broj otvorenih predmeta na kraju 2009. godine iznosio je 1.255, dok je 31.12.2010. godine Ured disciplinskog tužioca imao u radu 1.024 neriješena predmeta, a na dan 31.12.2011. godine 819 predmeta. Dakle, UDT kontinuirano uspješno radi na smanjenju broja neriješenih predmeta.

Tabela br. 3. Pregled dinamike priliva i rješavanja pritužbi za period 2010.-2014.

Dinamika priliva i rješavanja pritužbi						
Parametri	2009.	2010.	2011.	2012.	2013.	2014
Broj primljenih pritužbi	1.091	1.085	1.111	1.229	1.196	1129
Broj riješenih pritužbi	1.187	1.319	1.319	1.308	1.205	1138
Prosječni mjesečni priliv pritužbi	90,9	90,4	92,6	102,4	99,6	94
Prosječno mjesečno rješavanje pritužbi	98,9	109,9	109,9	109	100,4	95

## 5. Disciplinski postupci

### Pokrenuti disciplinski postupci

UDT je u 2014. godini pokrenuo ukupno **18 disciplinskih postupaka**, te je tako broj pokrenutih disciplinskih postupaka identičan broju pokrenutih disciplinskih postupaka u toku 2013. godine.

Uz disciplinske postupke, UDT je u jednom slučaju pokrenuo i postupak privremenog udaljenja od vršenja dužnosti tužioca.

Tako, postupci propisani Zakonom o VSTV-u (disciplinski i privremeno udaljenje) su pokrenuti protiv ukupno 12 (dvanaest) sudija i šest (šest) tužilaca<sup>1</sup>. Najviše postupaka je pokrenuto u odnosu na sudije prvog stepena, dakle u odnosu na sudije općinskih sudova (7 sudija) i osnovnih sudova (2 sudija). Ostali postupci su pokrenuti u odnosu na pet kantonalnih tužilaca, troje sudija kantonalnog suda i jednog tužioca Tužilaštva Bosne i Hercegovine.

U 2014. godini je od ukupnog broja riješenih pritužbi (1.138), njih 28 rezultiralo pokretanjem disciplinskog postupka<sup>2</sup>, pa tako procenat osnovanosti pritužbi za 2014. godinu iznosi 2,5%.

Tabela br. 4. Postotak osnovanosti pritužbi

Godina	2005.	2006.	2007.	2008.	2009.	2010.	2011.	2012.	2013.	2014
Postotak osnovanosti pritužbi	2,08	3,09	4,51	0,94	1,43	2,43	3,11	4,9	2,5	2,5


### Okončani disciplinski postupci

Pravomoćno je **okončano ukupno 17 (sedamnaest) disciplinskih postupaka** u kojima je izrečeno 18 disciplinskih mjera za ukupno 13 sudija i 4 tužioca. Grafikon broj 2. prikazuje strukturu nosilaca pravosudnih funkcija kojima je izrečena mjera u toku 2014. godine. Značajno je napomenuti da u toku 2014. godine nije odbijena niti jedna disciplinska tužba.

<sup>1</sup> Protiv jednog tužioca je istovremeno pokrenut disciplinski postupak i postupak privremenog udaljenja.


<sup>2</sup> Dakle, u okviru 18 pokrenutih disciplinskih postupaka obuhvaćeno je ukupno 28 pritužbi.

Grafikon br. 2. Pregled izrečenih disciplinskih mjera po nosiocu pravosudne funkcije



Izrečene su sljedeće disciplinske mjere: smanjenje plate – 8, pismena opomena – 6, javna opomena – 3 i trajni premještaj sudije u drugi sud – 1. Grafikon broj 3. prikazuje procentualni udjel svake mjere pojedinačno u odnosu na sve izrečene mjere u 2014. godini.

Grafikon br. 3. Pregled izrečenih disciplinskih mjera



Od ukupnog broja pravosnažno okončanih postupaka, 13 (trinaest) je okončano zaključivanjem sporazuma o zajedničkoj saglasnosti o utvrđivanju disciplinske odgovornosti, odnosno, donošenjem odluke o prihvatanju sporazuma, a u jednom disciplinskom predmetu, predloženi sporazum o zajedničkoj saglasnosti o utvrđivanju disciplinske odgovornosti je odbijen.

Četiri disciplinska predmeta okončana su donošenjem odluke o utvrđivanju disciplinske odgovornosti, nakon provedenog postupka.

U toku 2014. godine nije odbijena niti jedna disciplinska tužba.

U 2014. godini, utvrđena je odgovornost sudija za sljedeće disciplinske prekršaje:

- tačka 8.: „nemar ili nepažnja u vršenju službenih dužnosti“ – 8 sudija;
- tačka 10.: „neopravdano kašnjenje u izradi odluka ili u drugim radnjama u vezi s obavljanjem dužnosti sudije ili bilo kakvo drugo ponovljeno nepoštivanje dužnosti sudija“ – 5 sudija;
- tačka 17. „propuštanje, iz neopravdanih razloga, da postupi u skladu s odlukama, naredbama ili zahtjevima Vijeća“ – 1 sudija;
- tačka 22.: „ponašanje u sudu i izvan suda koje šteti ugledu sudijske funkcije“ – 2 sudija;

Što se tiče tužilaca, oni su 2014. godini odgovarali za sljedeće disciplinske prekršaje:

- tačka 8.: „nemar ili nepažnja u vršenju službenih dužnosti“ – 1 tužilac;
- tačka 9.: „neopravdano kašnjenje u izradi odluka ili u drugim radnjama u vezi s obavljanjem dužnosti tužioca ili bilo kakvo drugo ponovljeno nepoštivanje dužnosti tužioca“ – 2 tužilac;

- tačka 23. „bilo kakvo drugo ponašanje koje predstavlja ozbiljno kršenje službene dužnosti ili dovodi u pitanje povjerenje javnosti u nepristrasnost i kredibilitet tužilaštva“ – 1 tužilac

S obzirom na podatak prema kojem je dana 31.12.2014. godine u Bosni i Hercegovini bilo registrovano ukupno 1.101 sudija i 360 tužilaca, procenat sudija za koje je utvrđena disciplinska odgovornost u 2014. godini iznosi: 1,27%, a tužilaca: 0,83%.

Tako ovaj procenat u odnosu na sve nosioce pravosudnih funkcija u BiH za 2014. godinu iznosi 1,16%. Ovaj procenat je u 2013. godini iznosio 1,20%, a u 2012. godini 2,5%.<sup>3</sup>

## **6. Postupanje UDT-a po informacijama sudova i tužilaštava o predmetima u kojima je nastupila zastarjelost krivičnog gonjenja**

UDT po službenoj dužnosti, od 2011. godine, prati i postupa po izvještajima sudova i tužilaštava o nastupilim zastarama krivičnog i prekršajnog gonjenja. Tako, prema opštoj instrukciji Glavnog disciplinskog tužioca od 21.6.2011. godine, UDT sve informacije o zastarama, registruje kao *ex officio* pritužbe, uključujući sudske i tužilačke predmete.

U svom dosadašnjem radu, UDT je registrovao više od 400 *ex officio* predmeta u vezi izvještaja o zastarama. Također, potrebno je napomenuti da je UDT zaprimio i određeni broj pritužbi stanaka koje se odnose na zastare prekršajnog ili krivičnog gonjenja u sudskim ili tužilačkim predmetima. Uglavnom, ove pritužbe su podnosili organi ovlašteni za pokretanje prekršajnog postupka, prije svih Federalna i Republička uprava za inspeksijske poslove.

Tako su u 2014. godini pokrenuta ukupno 4 disciplinska postupka zbog nastupanja zastare krivičnog gonjenja i zastare vođenja prekršajnog postupka. Ovim disciplinskim tužbama obuhvaćen je ukupno **51** predmet u kojem je nastupila zastara krivičnog gonjenja i **88** predmeta u kojima je nastupila zastara vođenja prekršajnog postupka.

Ured disciplinskog tužioca je od 2011. godine ukupno pokrenuo 18 disciplinskih postupaka protiv nosilaca pravosudnih funkcija zbog nastupanja zastarjelosti krivičnog gonjenja i zastarjelosti vođenja prekršajnog postupka.

## **8. Ostale aktivnosti UDT-a**

Ured disciplinskog tužioca je u februaru 2014. godine, u okviru projekta učenja na daljinu, Visokog sudske i tužilačkog vijeća BiH, učestvovao u kreiranju priručnika „Profesionalni i etički standardi u pravosuđu Bosne i Hercegovine“. Isti priručnik, sa pratećom prezentacijom, dio je materijala modula koji obrađuje temu profesionalnih i etičkih standarda u pravosuđu BiH.

U organizaciji Atlantske inicijative, uz podršku Ambasade Sjedinjenih Američkih Država, Glavni disciplinski tužilac je uzeo učešće u panelima na temu seksualnog uznemiravanja, te učestvovao u kreiranju priručnika o rodnom uznemiravanju. Kao rezultat uspješne saradnje, glavni disciplinski tužilac je u septembru 2014. godine posjetio pravosudne institucije u Washingtonu. Nakon sastanka sa glavnim disciplinskim tužiocem Vašingtona, Distrikt Kolumbija (Washington, D.C.), glavni disciplinski tužilac, odnosno Ured disciplinskog tužioca, pozvan je od strane predsjedavajuće Nacionalnog udruženja disciplinskih organa Sjedinjenih Američkih Država (National Organization of Bar Counsel), da pristupi američkom Nacionalnom udruženju disciplinskih organa u svojstvu člana.

U okviru provođenja istraga u predmetima UDT-a disciplinski tužioci su u toku 2014. godine, radi vršenja uvida u predmete, te provođenja ostalih istražnih radnji, posjetili Kantonalno tužilaštvo Kantona Sarajevo, Općinski sud u Sarajevu, Osnovni sud u Banjoj Luci, Općinske

---

<sup>3</sup> U 2012. godini u Bosni i Hercegovini je bilo registrovano manje sudija i tužilaca nego što je to slučaj u 2013. i u 2014. godini, te je u toj godini pokrenut i veći broj disciplinskih postupaka.

sudove u Cazinu, Kaknju, Lukavcu i Sanskom Mostu, te pravosudne institucije u Bihaću i Tuzli.

UDT je u septembru 2014. godine u organizaciji CEST-a Federacije BiH, zajedno sa Ljiljanom Lalović, sudijom Suda BiH, učestvovao u edukaciji novoimenovanih nosilaca pravosudnih funkcija na temu „Nosioци pravosudne funkcije i društvo”.

Predstavnici Ureda glavnog disciplinskog tužioca su u oktobru 2014. godine uzeli učešće u Savjetovanju iz krivičnog pravne oblasti organizovanom u Neumu, BiH, kao i u radionici na temu „Rješavanje starih predmeta“ organizovanoj od strane VSTV-a BiH u oktobru 2014. godine.

U oktobru i u decembru 2014. godine, pod pokroviteljstvom OEBS-a iz Srbije, Glavni disciplinski tužilac je posjetio Državno veće tužilaca Republike Srbije i Visoki savet sudstva Republike Srbije, kojom prilikom je, kao predavač, uzeo učešće u seminarima koje je, na relevantne teme za disciplinske organe iz Srbije organizovao OEBS iz Srbije. Glavni disciplinski tužilac je Državno veće tužilaca Republike Srbije, zajedno sa članom VSTV BiH Obrenom Bužaninom, posjetio i u cilju pružanja podrške uspostavljanju Etičkog odbora Državnog veća tužilaca Republike Srbije.

U Izvještaju o napretku Bosne i Hercegovine za 2014. godinu od 08.10.2014. godine je navedeno: „Što se tiče **odgovornosti**, Ured disciplinskog tužioca je zaprimio veći broj pritužbi protiv nosilaca pravosudnih funkcija, posebno tužilaca. Cjelokupni trend je smanjenje broja neriješenih predmeta i kraće vrijeme za rješavanja predmeta. Porastao je broj disciplinskih postupaka pokrenutih po službenoj dužnosti zbog nastupanja zastare (ukupno 50% od svih disciplinskih postupaka). Od 18 disciplinskih postupaka, okončano je 17 i izrečene su disciplinske mjere. Trenutni pravni okvir ne predviđa adekvatne disciplinske mjere protiv nezakonitog postupanja nosilaca pravosudnih funkcija. Usvojen je Pravilnik o sukobu interesa za članove VSTV-a.“

Glavni disciplinski tužilac

Arben Murtezić